



宛陵先生文集目錄卷第四十四

寄維揚許待制

紫微亭

聞臨淄公薨

吳正仲遺二物

和張簿見贈

送正仲婺倅待闕

再送正仲

鐵獺

送回上人

送徐尉罷任歸

志來上人寄醪醖

聞鶯

杜鵑

和李察推留別

送李節推

新開墳路

送鄒秀才游浙

張十遺牡丹

和唐彦猷十詠

子獻甫遺柳子

時魚

烏賊魚

和行之枇杷

和行之紅梅

送玉尉罷任歸京

南陵息亭藻閣

讀問月

雨中飲

和季野游山門寺

目錄終

宛陵先生文集卷第四十四

寄維陽許待制

當時永叔在揚州中秋待月後池頭約公準擬與
我敵是夜二雄張利矛我時小却避其銳風愁雨
怛嫦娥羞主人持出紫石屏上有朏鬼桂樹婆娑
而枝虬作詩誇詫疑天公愛惜光彩向此收四坐
稽顙歎辯斂文字響亮如清球更後數日我北去
相與送別城門樓誰知康成能飲酒一飲三百杯
不休雞鳴各自便分散山光寺側停畫舟我來謁
公公未起卧索大白湏扶頭而今倏忽已八載公

領府事予居憂歐陽始是玉堂客批章草詔傳星
流問公可憶羊叔子雖在軍中常緩帶而輕裘寄
聲千里能信不

紫微亭

在池州

江雲如旗脚墨點飛鴈行平圃采芳菊上水酌桂
漿爲言此何時杜子逢重陽醉思莊生達哂彼齊
景傷至今孤亭間獨有九日章昔我來齊山山僧
迎道傍騎馬到寺門亂石屹若墻值雨不徧歷但
取山泉嘗牧之舊游處苔滑屐莫將却返弄水涯
隔溪望青蒼絕頂見茅屋洪波日湯湯雲霞與鴈
鷺還動秋客腸去逾十五年游宦韓陳梁哀哀遘
禍殃乃再居南方欲往尚未可追吟寄支郎

聞臨淄公薨

至和癸巳十二月兮友人語我火犯房芒射鉤鈐
而拂上相兮禍非弼臣誰可當昨日聞太宰悟天
道而畏忌兮歸卧其第三拜章太宰既不得請而
賜黃金百兩以爲壽兮諫官御史猶擊強明年孟
陬臨淄公薨兮果然邦國撓棟梁豈無神醫善藥
以起疾兮固知稟命有短長公自十三歲而先帝
兮謂肖九齡宜相唐後由石渠鳳閣禁林以登樞

兮俄佩相印居廟堂出入藩輔留守兩都兮其民
詠歌盈康莊官爲喉舌勲爵一品兮經筵講義尊
蕭匡年踰順耳不爲天兮文字百卷存縑箱子孫
侁侁同鴈行二女貴婿富與楊未知歸葬何土鄉
臨川松栢安可忘我爲故吏摧肝腸洒淚作雨春
悲涼精魄其歸於天乎必爲星宿還高張骨肌其
歸於土乎必爲蕙芷不滅香墓碑墓銘誰能盡其
美我爲欲傳萬古須歐陽

吳正仲遺二物詠之

金盞子

鍾傳令公謂之醒酒花

鍾令昔醒酒豫章留此花黃金盞何小白玉椀無
瑕始入吳郎宅還歸楚客家從茲不能醉只恐賣
流霞

疊石

十片寒湖滑千秋白浪根蒼蒼古崖色疊疊老苔
痕欲象巨鼇頂俯當科斗盆唯愁作險說平地起
崑崙

依韻和宣城張主簿見贈

韓子於文章所貴不相侑譬彼古今人同心不同
貌吉從志久慕亦以重名教鳴鍾與享鼎易馱非

苦樂祿仕不及親揚名可爲孝君方佐大邑美錦
同翦鉸遂令吾鄉民綢直無曲撓旣暇乃作詩欲
與前人較朝來忽有贈捧若管窺豹又如捕鯨魚
空自持網罩心降醉且睡昏昏不知覺

送吳正仲婺倅歸梅谿待關

山水東陽去未去朋親舊雪朝復朝更無越相逃
名舸猶看吳王送女潮海燕歸齊聲滿屋谿梅開
過子生條明年十月吏迎處七里灘前棹奏簫

再送正仲

擬君杜鵑花發當杜鵑時朱袍照白日光彩生路
岐自比青鼠爪中心如亂絲絲亂復不理况復遠
別離傾觴恨不深立馬恨不逢千山從此隔三歲
或前期爾後各寄書空識滿紙辭非如笑言樂但
有牽懷悲念昔蘇與李徘徊問何之

鐵獺新買小馬也

朝乘鐵獺上青山最滑春苔亂石間出入白雲勝
蠟屐玉驄雖貴未應閑

送回上人

因往湖州
謁吳正仲

雲出任西東飄然意莫窮山川生眼界巾舄徧區
中去去曾無着勞勞本是空梅谿人可見重爾似

泓公

送徐絳秘校罷涇尉而歸

去年茶熟君得補今來茶熟君已去心曾不計茶
有無隼在高風自騰翥昨日我送吳侯歸未忍重
臨離別處不若群公憐禰衡相逐縱橫唯柳絮
志來上人寄示醑醑花并馱塲茶有感

京都三月醑醑開高架交垂自爲洞素葉層層紫
蓋香釀歸光祿春生甕東陌西池走鈿車芳林廣
囿飛朱鞞二年不到大梁城江邊淚滴肝腸痛況
茲齒髮漸衰老已是憂愁不如衆宣城北寺來上
人獨有一叢盤嫩蘂去歲遊吳求不得今朝還喜
自持送眼底雖同往日看樽前所憶皆成夢又置
新茶采雨前烏鬚墜塲雲色弄對花却酒煮香泉
強詠才慙非白鳳

聞鶯

最好聲音最好聽似調歌舌更叮嚀高枝拋過低
枝立金羽脩眉墨染翎

杜鵑

蜀帝何年魄千春化杜鵑不如歸去語亦自古來
傳月樹啼方急山房客未眠還將口中血滴向野

花鮮

依韻和李察推留別

我學猶肥腴一食輒易馱君何以名虛每來車馬
淹經術素所淺道義安得漸獨有寒苦吟可與前
古兼今者抱悲哀憔悴居窮閭愁鳴無好音亟別
空顧瞻詩言留彼美欲和慙無鹽短兵當長戈馬
得不盡殲又如握枯蒿逆風乘烈炎膏盲靡自療
誰復望針砭

送李節推挈內歸寧池陽并李察推往南
康軍嫁妹二君同行

江上雙畫舸風帆或先後晚共泊蘆洲欣同尊而
友一過長風沙一住貴池口當時驄馬客今是憑
熊守每憐諸女賢與婿來爲壽上去至南康嫁妹
事箕箒不畏楊瀾險不爲廬峯秀二君情義著我
送何須酒

新開墾路

古徑約城斜鋤荒可過車直穿深篠去不比繞村
賒伐樹侵籬脚裨塍掘澗沙欲爲蘭若處松柏屬
吾家

送鄒秀才游浙

鞍傍帶劔魚皮鞘馬後攜童越葛衫度水綠山君
底急區區為峇古千巖

四月三日張十遺牡丹二朵

已過穀雨十六日猶見牡丹開淺紅曾不爭先及
春早能陪芍藥到薰風

依韻和唐彦猷華亭十詠

顧亭林

顧亭林湖在東南三十五里湖
南又有顧亭林傳是顧野王居

鄉林空林木不見古人居猶尋古人跡更與古人
踈昔為賢豪里今作魑魅墟湖邊夜夜月光彩沙
上餘

寒穴

金山有寒穴
出泉甘清

山頭寒泉穴淨若鏡面平熨齒敲冰冷貯餅微玉
聲傍有野鹿跡上啼林鳥清何由一往挹况復方
病醒

吳王獵場

在華亭谷東今
其地為桑陸

孫氏有吳國四海未息戈獵以耀威武平野萬騎
羅英雄魏與蜀貔虎一何多世事異莫究但見桑

麻坡

柘湖

在南七十里吳越春秋海鹽縣淪沒為柘湖
吳地記秦時有女子入湖為神今存其祠

柘土久陷沒千歲嗟水濱不復吳鹽邑空有秦女

神浩蕩吞海日曠闊迷天津扁舟誰能往旦暮逢
漁人

秦始皇馳道在崑山南四里有大通吳成

秦帝觀滄海勞人何得脩石橋虹霓斷馳道鹿麋
遊車轍久已沒馬迹亦無留驪山寶衣盡萬古空

冢丘

陸瑁養魚池在縣西令名瑁湖云陸瑁所居也

來觀瑁湖水乃是陸生居春塘草幾變誰贈此中
魚莫容科斗應亦有魯王餘不隨蛟龍飛神龍未
可除

華亭谷在縣紫紆三百里入松江

斷岸三百里縈帶松江流深非桃花源自有漁者
舟閑意見水鳥日共泛觥籌何當騎鯨魚一去幾

千秋

陸機宅華亭谷水東有崑山即其宅機詩云鬢髯谷陽水眷戀崑山陰

我思陸平原廢宅荒草深才高乃速禍事往不可
箴飢鳥噪樹顛野鼠窟庭陰黃耳亦已死家書無
復尋

崑山華亭谷東二里有崑山陸機祖葬而生機雲人以崑山出玉以擬其美焉

陸氏幾世祖葬此生令名猶如產美璞遂爾傳嘉

聲寒巖畜奇秀源水日東傾何言千載間二子不更生

三女岡

在東南八十里云是吳王葬女為三岡

吳王葬三女因留此岡名已化被燦質合有蘭蕙生嬋娟夜月照暗藹朝霧平古鬼如未泯不遠闔閭城

李獻甫於南海魏侍即得椰子見遺

魏公番禺歸逢子蕪江口贈以越王頭還同月友首割解為飲器津漿若美酒我獨愧先生饌致崇師友應知愈飢渴况是懷思久

齊民要術云其俗為之越王頭

時魚

四月時魚連浪花漁舟出沒浪為家甘肥不入罟師口一把銅錢趁槩牙

烏賊魚

黃馬二君餉

海若有醜魚烏圖有烏賊腹膏為飯囊菖昌貯飲墨出沒上下波馱飲吳越食爛腸夾雕蚌隨貢入中國中國捨肥羊啗此亦不惑

依韻和行之枇杷

予送紅梅與之

五月枇杷黃似橘誰思荔枝同此時嘉名已著上林賦却恨紅梅未有詩

送紅梅行之有詩依其韻和

綴綴紅梅肥似蠟濛濛飛雨澁如脂吳郎齒軟食
不得翻憶張公大谷梨

送王宗望罷宣城尉歸京

南土梅已黃北人舟競發去意方若渴望林殊未
歇言歸向梁宋獨歎滯楚越行聞拜卿屬恩下蒼
龍闕

寄題南陵息亭藥閣

竹裏有清館池中多藕花日光穿岸脚水影射簷
牙柱穴蜂歸響爐檀火過窰已知民訟息漉酒費

巾紗

讀問月

我讀李白問月詩乃知白也心太癡明月在上爾
在下月行豈獨君相隨白兔搗藥亦何療嫦娥孤
棲欲嫁誰古人今人被磨滅休問有來都幾時唯
有長照金樽裏此言萬世不可移但能自醉月自
落夜夜如此誰復疑一月二十二三日半是風雨
相乖離常願晴明對以飲耳邊流水勝鳴絲

五月十日雨中飲

梅天下梅雨綏綏如亂絲梅生獨抱愁四顧無與

期妻孥解我意草草陳酒卮檻外百竿竹新筍高
過之竹色入我酒變作青瑠璃一飲眼目光再飲
言語遲三飲頽然兀左右歎我衰有鳥從東來引
頭闖深枝發聲醒我醉提壺美無疑典衣不直錢
唯是布與絺安得如古人車傍挂鷓夷

次韻和吳李野游山寺登望文春山

山屬宣城

楚客好山水五月上高峯峯頂望文春草樹皆有
容身既近猿鳥心欲追喬松石壁出雲背苔磴千
萬重下視霹靂飛忽起枯株龍却還僧居宿暮踐
樵子蹤作詩留粉墻削藁爲我封美璞世未識獨

令和氏逢

宛陵先生文集目錄卷第四十五

五月十七日夜夢

和題岳上人澄

和馬都官溪橋

寄隱靜賢長老

和馬都官苦熱

歷陽過杜挺之

和公疎送嶼師

和示樸之盧氏石詩

逢曾子固

真州東園

行吟

僧子思以卷來見

和許待制竹拄杖

遇畫工來嵩

省符上人

沈學士知真州

送杜君懿宣倅

閱張學士出書

讀黃秘校卷

許待制歲旦生日

卷宣闈司理

卷鵝湖長老

和曾子進早春

酬和馬都官齊少卿

贈江寧王高士

卷蕭少府卷

卷孫都官卷

和王司封卷

王高士歸建業

呂寺丞家膳

趙秘校見訪

卷張今卷

和卷王學士見寄

和孫浦二都官

聽張令彈琴

走筆送王琪

宣司理餉蒸鵝

目錄終

宛陵先生文集卷第四十五

五月十七日四鼓夢與孺人在宮庭謝恩
至尊令小黃門宣諭曰今日社與卿喜此
佳辰便可作詩進來枕上口占

同謁未央殿共霑明主恩
晃旒親日月蹈舞荷乾
坤龍尾三重峻螭頭幾級尊
德音欣社日撫語走
黃門陰會皆如實陽開不復存
空餘破窻月流影
到床垠

次韻和吳季野題岳上人澄心亭

空山舊迳綠苔滿古寺齋盂白薤蒸暑雨生中飛

漠漠野泉林外落層層從來勝絕皆離俗未有幽
深不屬僧唯愛溪頭一尋水莫聞流浪莫聞澄

次韻和馬都官宛溪浮橋

在昔當陽侯建橋臨大川洪波不為阻馳道南北
連何此小溪上擬象坦且平馬頭分未欄水底裁
碧天白雨緊大竿斷虹生橫舷游魚不可見車騎

久臨淵

寄隱靜山懷賢長老

山有枇杷樹樹多獼猴群高僧心不着一似五峯
雲隨颺來溪口石上起氤氲果熟獼猴去自向瀑

澗分

次韻和馬都官苦熱

日光亭午時赫若鎔黃金鳴鳶不生風流雲不成
陰赤地有焦土烈野無沃霖涸潭深幽幽枯嶽高
岑岑火龍將焚鬣陽鳥多渴心肌膚非木石絺綌
煩衣襟冰盤不可見空對瓊玖吟

歷陽過杜挺之遂約同入汴

滄海瀉玉自外天牛斗傍邊客正迴人說維摩居
士病我同王子雪舟來汀沙沮洳潮新落山日曛
曛霧始開去約河隄春柳動與君吹紫步徘徊

和胡公踈送嶼師移居寶光寺

宋日天王寺梁時太子園地猶隨世變物豈與人
存欲問移居意還應避俗喧相期唯有月夜夜在
高原

胡公踈示祖擇之盧氏石詩和之

盧肇家

袁州太守蓬山客來過盧家尋怪石盧家百物今
已空唯石難移留舊蹟埋沒尚存三四分雨淋日
炙如皴皴太守惻然呼健兒荷鋤東鋪爭來役健
兒掘土不為堅旋旋剗沙見圭隙漸竒漸異人忘
勞更索更深知幾尺瘦峯削出嵩華骨虛竅鑿破

蛟螭額千指曳繩車四輪擊鼓助力歸東陌東陌
東頭湖水傍黃泥洗盡何蒼碧故宅愈冷東湖喧
貴賤競觀無礙隔太守自憐堅直心愛少憎多屢
遭謫南至蒼梧及桂林名山徧訪無窮僻所宜厭
慣不入眼向此歌吟尤愛惜我思求舛滁陽時大
誇古翠菱溪獲作詩遠寄予與蘇高唱相隨無節
拍今知賢人趣向同玩好託情忘俗格建康從事
胡公踈一見詫君如李白雄才落筆瀉天河綴韻
孤清仍險窄入探虎穴誰為難辭通造化方能敵
殿後吾雖膽力強獨鞭疲馬終無益

逢曾子固

前出秦淮來舫尾偶攬鷺遽傳曾子固願欲一相
見順風吹長帆舉手但慕羨揚子東園頭下馬情
眷眷昔始知子文今始識子面吐辭亦何嚴白晝
忽飛霰我病不飲酒烹茶又非善冷坐對寒流蕭
然未知倦

真州東園

國賦有常計計者豈不賢日夜疲精神自鑿膏火
前新春力有餘鋤荒東乳偏壘土以起榭掘沼以
秋蓮竹栢為冬榮桃李為春妍役役吳楚艘來泊
常留連下江忘其險入漕忘其遭許公作此意吾
亦見其權不獨利於己願書棠樹篇

行吟

持轡趨代北妄意希名馬代北馬如雲由來重取
舍王官待才能高下不苟且行都未脩筋黃金誰
變瓦吾當保吾真甘歸事田野

冥蟻橘林下正在結實時附緣與出入安可責於
斯養大不問細使遠不問遲遠遲必有報細大必
有期休哉豢龍氏終自辨蛟螭

僧子思以卷來見

明珠與翡翠中國反好之詩書出鄒魯誦學無蠻夷服彼而習此養驛安問犁古者耕釣士處心殊處卑譬彼乃可語吾病強扶持

依韻和揚州許待制竹拄杖

楚竹翦霜叢何慙漢使筇鳩形殊用刻馬箠不同功挺特生難變支離分已窮輕肥思比鶴短髮任如蓬倚以為高趣持之見素風步郊聊實下行樂偶從東屢刺莓苔破深穿苑圃通辯繁時畫地默意或書空古血有湘跡舊林無阮蹤將渠誰覺老要此豈關慵莫駭傾巢鳥須虞蠹穴蟲誰能求道

術跨作上天龍

遇畫工來嵩

朝來又入揚州郭千萬中人識者誰唯有來嵩曾畫我依稀見似昔年時

省符上人

春秋一萬八千字不間吳人楚人事佛衣儒談世已罕節行又與其徒異往來揚州三十年曾見華堂荆棘地獨聞依舊坐焚香尚把殘編討遺意

沈學士景休知真州

太守旛旗近國門州民迎望若雲屯家風自有東

陽詠主道新移北海罇紅錦臂鞞觀粉質塗金珂
勒駕朱軒他時儻取春秋對莫以周襄出鄭論

送杜君懿屯田通判宣州

京兆外郎稱善書當時相與集江都日書藤紙爭
持去長鈎細畫如珊瑚自茲乖隔三十載始駕吾
鄉別乘車吾鄉素誇紫毫筆因我又加蒼鼠鬚最
先賞愛杜丞相中間喜用蔡君謨爾後做傳無限
數州符縣板仍抹塗鼠雖可殺不易得猫口奪之
煩叱驅若君字大筆亦大穿墉瑣質無長規君到
官治事餘呼諸葛試問渠

張聖民學士出

御書并法帖共閱之

又一軸蘇子美書杜懿病馬

冰膠楚舸歲將窮廣陵別乘憐老翁殷勤來邀強
一往虛堂肴酒羅甘豐我病胃寒不下咽七筋謾
舉叨席中主人欲客心意歡出以飛帛騰龍鸞刑
政二字布楷法古今書帖未足觀坐間杜子好弄
筆詆譏前輩無全完一見寶蹤天下妙稽首贊仰
舌吻乾如此別識已太險我不頌詠還應難

讀黃莘秘校卷

嵇康昔彈廣陵散商聲高與宮聲緩託名山鬼未

傳人古桐紉絲絲不斷一聞殭臥竊其音世間雖
得能亦罕賢明以之知盛衰愚昧以之為妄誕頃
年過我在蕪城忽聽長拍去欲懶鳳凰養雛飛未
高雞鶩成群翅終短龍章秀骨苦輕時繼作五絃
湏欸欸

贈許待制歲旦生旦

天曆重更端哲人茲命世嘗聞月旦評况是高陽
裔耕花作壽杯爆火通鑪桂穹龜及蒼鶴尚以千
年係曰惟五行秀復與明時契他日求老成不須
從渭汭

答宣闈司理

義趣深傳訓或得失後人語雖淺辨識猶百
一歐陽最知我初時且尚窒比以為橄欖理甘始
稱逆老於文學人尚不即究悉宜乎與世士橫爾
遭詒啣誓將默無言負暄方抱膝非非孰是是都莫
答問詰歲暮宣叅軍辭如鮑昭逸粲然傾明珠褒
我頗過實便言楚江萍光彩倅旭日自慙流浪蹤
不得蒿芹匹復為苦硬句酬報強把筆

答鷺湖長老紹元示太玄圖

鷺湖有鷺吾不問鷺湖無鷺吾不疑道士須換黃

庭經釋子自明太玄辭噫嘻兮此意迥與山陰別
我亦曾非逸少為

新韻曾子進早春

新雷歲旦發聲嚴水管寒銷細滴簷花甲將看枝
上折虵鱗不復地中潛黃河分派來應早白首歸
朝意自恬強欲擬君為秀句便無才思似江淹

依韻和馬都官齊少卿酬和

同時沈宋稱二豪曾說龍門奪錦袍我對前流接
清唱泰山輕重於鴻毛

贈江寧王高士

自古江南風俗美喜君高趣暮先賢藥無遠近寧
論報家有圖書不計錢已住秦淮借風月遍尋吳
國舊山川塵纓我繫未能解每一來過駐畫船

答蕭淵少府卷

君先大夫臨終時夢中嘗賦曉寒歌騎龍跨魚不
是誕直對上帝傳吟哦才如李賀天亦少宜其在
世尤難多文章父子不相似君今平易祖襲那錮
鐵錦裝各有用高下安得與等科大都精意與俗
近筆力驅駕能逶迤野雉五色且非鳳知時善鳴
雞若何

答孫直言都官卷

具深相割啗不如無勇人以詩而酬詩徒用多少
均我言雖至簡意切誰見親汲井欲到深磨鑑欲
盡塵寰泉與青銅光潔靡故新臨觴報嘉貺醉語
是天真

依韻王司封寶臣答卷

王家再見仲宣詩魚目盈車換斗璣自愧不從靈
蚌吐誰教相並夜蟾飛暫增光價千金重終覺枯
陳一芥微已屈至珍來彈雀恩蛇銜報此能希

高士王君歸建業

風雨起春寒乘潮曉帆送目看瓜步雲心近茅家
洞忽覺柳已青來時枝尚凍羨爾向江南正開新
釀甕

呂寺丞家膳

春雨薄無泥野苗青入俎深堂開畫圖飛鳥驚寒
渚名筆今寂寞嘉賓競推許主人何太勤不異具
雞黍

趙秘校見訪

文學儒家子儒本通天人蟪蛄尚先喜吾黨何迷
津津亭一相過不笑復不頻應此識恬泊曾匪慢

爾賓

答張令卷

嘗聞甥似舅似舅詩尤少古意得河源新聲變春
鳥讀之不敢倦十未能一曉顛倒文字間使吾心
擾擾

依韻答泰州王道粹學士見寄

君同黃鵠游海嶠我學白雲歸帝鄉已愛健翅自
鼓舞誰怜孤影猶飄揚安得相從在霄漢于今留
滯嗟繫韁欲隨輕風挹君袂滿野春雨生迷茫

依韻和孫浦二都官展墓由大明精舍而歸

新松煙翠入衣巾兩後岡原不起塵霜露悲懷今
正切曾非結客去尋春

拜墮忽生寒食心應緣春入感啼禽淚沾宿草根
仍凍馬立荒沙跡已深野老輟耕風料峭山房開
晝日陰森婦鞍却望原頭路羃歷輕煙物景沉

張聖民席上聽張令彈琴

一聽履霜霜滿足再聽綠水聲綠谷我行日月
春波嫩苔沙雨侵魚目漁歌晚唱泛水來天浸滄
浪光可掬坐中此意自絃生中郎五弄人難熟人
知難熟獨善彈彈拍未終脂駕速鄭衛古來多喜

聞卒章為我歌溟澳時聖民赴齊少卿家會

走筆送王琪

江南二月草青青送子歸時已滿汀誰信而今有忠義祇知七日哭秦庭

宣司理餉蒸鵝

昔年相國籠之贈今日參軍饌以蒸一咀肥甘酬短句定應無復謗言興

宛陵先生文集卷第四十五

宛陵先生文集目錄卷第四十六

和許待制春雪

送廣西潘提刑

大明寺平山堂

和王平甫見寄

和丁元珍見寄

王學士寄車螯

席上賦紅梅

平山堂雜言

自感

和河上寫望

和試筆偶書

和民朝謁建隆寺

和許待制宴賓

和許待制偶書

閨思

代寄王學士

和許待制病起偶書

依韻和新栽竹

和戲題

和春日偶書

和禁煙近事之什

和春日見示

和偶書相留

讀邵不疑卷

送寧鄉令張沈

和許待制送行

和不疑見荅

贈張伯益

和不疑烹茶觀畫

和不疑冷淘會

獨酌偶作

荅杜挺之遺鰲魚乾

目錄終

宛陵先生文集卷第四十六

依韻和許待制春雪

密雪犯陽和寒階覆短莎
條牙摧不展鳥舌嚙應
多變今已為失易消如未
苛桃花禹門水早晚見
通波

送廣西提刑潘比部

伯恭

白麻新拜大丞相黃紙首
除南省郎欲使平刑安
遠俗莫辭棄傳歷炎荒桂
林地險通椎髻陽朔峯
奇削劍鋌自有王門舊勳
業且酒稀作上書囊
大明寺平山堂

陸羽烹茶處爲堂備宴娛岡形來自蜀山色去連
吳毫髮開明鏡陰晴改畫圖翰林能憶否此景大
梁無

依韻和王平甫見寄

尊王興霸國古莫重齊桓仲尼書大法亦莫重更
端文章革浮澆近世無如韓健筆走霹靂龍蛇奮
潛蟠颶風何端倪鼓蕩巨浸瀾明珠及百怪容畜
知曠寬其後漸衰微餘襲猶未彈我朝三四公合
力興憤歎幸時構明堂願爲楹與藥期琢宗廟器
願備次玉珥謝公唱西都予預歐尹觀乃復元和

盛一變誰爲難行將三十載衣被劇織紉後生喜
成功往往舞朱干君家兄弟賢挺拔尤堅完譬彼
登泰山孰辨雲徑盤忽在高高巔兩腋猶挿翰我
久知子名曾未接子驩前者和君詩薄言慙兒肝
淮南喜子來袖刺字未漫明日聞渡江留書特相
安今又獲嘉辭至味非鹹酸

依韻和丁元珍見寄

我從江南來挂席江上正輕舟自行速不與風力
競乃省少時學強勉無佳興初如弄機杼未解布
絲經利器昧其持或反授人柄及親賢豪游所尚

志已定不厭朝市喧不須山林靜不爲煦煦妍不
爲巖巖冰遇物理自暢區處劇操令仍類楚野筠
忽從孤根迸便成翠琅玕久與風霜硬雖然達吾
真誰復究畢竟世間忘坦途盡欲求密徑哂我是
踈耳乎今蹭蹬蹭蹬誠可嗟所偶亦已併晚逢
二三友喜飲恨多病道路何遭迴季秋越春孟平
生景慕者邂逅出天幸接迹猶謂榮況此聲顏並
實慙寡時用又顧無竒行愛之不忍去自旦還至
暝在昔濁世賢徒知清酒聖但用醉爲娛一老少
不更稍思桃源人翩爾乘漁艇尋花逐水往豈念
衰與乘歌謳非俗情山響自答應以此謝君勤微
言期略聽衮衮不足爲試共幽人評

泰州王學士寄車螯蛤蜊

車螯與月蛤寄自海陵郡謂我抱餘醒江都多美
醞老來飲不滿一醉已關分甘鮮雖所嗜易飲亦
莫問嬌女巧收殼燕脂合眉暈貧奩無金玉狼藉
生恚忿妻孥喜食之婢妾困埽拊行當至京華耳
目飽塵坌此味爽口難書爲馱者訓

張聖民席上賦紅梅

吾家有嘉樹紅蘂開朝霧笑杏少清香鄙梅多俗

趣江都別乘居似見句溪園坐中勿苦疑結子看
春暮

平山堂雜言

蕪城之北大明寺闢堂高爽趣廣而意厖歐陽公
經始曰平山山之迤邐蒼翠隔大江天清日明了
了見峰嶺已勝謝眺齷齷遠視於一窓亦笑煬帝
造樓摘星放螢火錦帆落檣旗建杠我今乃來偶
同二三友得句欲霜鍾撞却思公之文字世莫雙
舉酒一使長咽慢肌高揭鼓笛腔萬古有作心胸
降

自感

左目忽昏花愁心亂劇麻文書都莫見藥物近憑
他眸子終何似形軀且願嘉唯期一開泰再望日

中鴉

我不嫌髭白白髭何自落雖然失醜衰將恐日疎
薄有生無不老歲事看秋籜一身憂已大毫髮誰
能度

二月二十八日

依韻和孫都官河上寫望

河上風煙愛此邦吳艘越舸不相降魚鯉直齧直齧橋
邊市花暗深深竹裏窓踈踈漸知寒食近鞦韆將

立小鬟雙年光取次須偷賞何用功名節與幢

依韻和試筆偶書

洗硯開書几拈毫喜子巢不爲微物撓自向小欄
敲已逐游絲末還緣翠葉梢因知生理大不必在
重文

和張民朝謁建隆寺二次用寫望試筆韻

荒臺殘壘舊名邦曾說王師此受降西漢衣冠拜
原廟五天龍象護經牕蜀岡井味人猶品隋帝宮
基闕尚覆自古興亡不須問風鈴閑聽響幡幢
躍馬侵星去啼鴉未出巢春裘風易裂從騎鎧相

敲紅日雙行柳黃金一抹梢乾坤功力大默誦易
中文

依韻和許待制後園宴賓

春來無處不幽芳誰復樽前歎異鄉繞榻綺羅觀
舊艷傍池桃杏照新粧柳條拂拂牽絲嫩菜粉輕
輕落酒香聞道主公偏愛客翻思當日醉莎場宛

城頭有莎場臨淄
公每飲於其間

依韻和許待制偶書

曉雨射舩珠瀉盤平明水上舞英殘鬪雞蹠惡輕
泥濕調馬蹄翻軟土乾深屋鸞巢將欲補密房蚕

蟻尚憂寒為言楚客甘蔬藪白芷香牙長嫩珊

閨思

望日赤如橘游梁音信稀愁心常似醉春絮等閑
飛江鱖看將爛芹牙吐尚微何時憑鷺子寄取錦
書歸

代書寄王道粹學士

已具扁舟訪使君忽逢春雨起淮濱花寒蛺蝶猶
相守水冷鴛鴦不暫分况約他時來寄蹟何須今
日去論文解裝無復山陰興且對荆釵與布裙

依韻和許待制病起偶書

桐柳陰陰翠色參幔房深邃靜於巖疾疑不是因
蛇影方秘曾傳白玉函煉蜜有時蜂競至墜羶無
數蟻來啣女奚困觸屏風響林鳥飢尋蠹木鷓趨
吏喜聞開便閣舞姬排北翦春衫嘉賓入幙金樽
抹賀客衝風席帽攬談出古人非騁辯詩陳王化
不言讒提綱勿用銖銖較列局緣從物物監龍腦
篆香盤屈曲虎頭彫枕剔空嵌年踰五十惟耽易
能格神明莫若誠

依韻和新栽竹

斲破煙叢帶筍移映軒臨檻特為宜龍孫已見多

奇節鳳實新生入翠枝不向阮家林下集還思渭
北水邊窺一花一草公休詠慣作蘭臺待從詩

依韻和戲題

揚州太守重交情我欲西歸未得行寒食尚賒花
水近妻孥煎去到天明

依韻和春日偶書

甕面春醅壓嫩藍盤中鵝角亦肥甘正宜醉夢輕
爲蝶苦怕酬詩密似蠶病起羊公方隱几歸來陶
令只乘籃河堤古木欣欣暗野水新秧拍拍浣已
向官資隨分足莫將忠憤等閑談況於世上諸般
獸不作人間一例貪陋巷自知當退縮擁門誰解
更趨叅高低趣向難爲合冷暖情懷固飽諳勉意
妻兒猶苟祿強顏冠冕未抽簪唯公恩遇留連久
頻對樽壘也負慙

依韻和禁煙近事之什

狂風暴雨已頻過近水棠梨着未多窈窕踏歌相
把袂輕浮賭勝各飛墻閑牽白日游絲颺細鷦黃
金舞帶拖小苑芳菲花鬪菜華堂嘲哢驚爭窠西
州駿馬頭如剝南國佳人頸似瑳結客追隨傾盡
榼分朋游樂藉青莎鞦韆競打遺鈿翠芍藥將開

翦纈羅我病乞求新火炙無心更聽竹枝歌

依韻和春日見示

春雨懶從年少狂一生憔悴爲詩忙不能屑屑隨
時輩亦恥區區憶故鄉白玉笛聲親府席六么花
拍動衣香龍咽嘹唳留行月鳳翼趨蹌巧定場粉
色酒容歡四座花光燭影照西墻虛榮浪貴知多
少安得如君展肺腸

依韻和偶書相留

在昔有言無不讎故於嘉詠豈宜休出奇吳國將
能戰探隱漢宮人戲闖吹笛夢來猶記曲愛歌老

去未忘謳車中變服爲秦客頭上南冠學楚囚日
求歡呼遺搏齒夜深談論廢更籌海陵已有從游
約今欲西歸且榜舟

讀邵不疑學士詩卷杜挺之忽來因出示
之且伏高致輒書一時之語以奉呈

作詩無古今唯造平淡難譬身有兩目瞭然瞻視
端邵南有遺風源流應未殫所得六十章小大珠
落槃光彩若明月射我枕席寒含香視草郎下馬
一借觀旣觀坐長歎復想李杜韓願執戈與戟生
死事將壇

送寧鄉令張沆

長沙過洞庭水泊風搖石青山接夷蠻白晝鳴鴉
鷄竹存帝女啼夔學林雍鑿不嫌卑濕往教令民
須聽

依許待制送行詩韻詠鷺以寄

江鷺銜泥日深堂拂玉琴不教開閣戶乃見主人
心掠水飛殊捷迎風去已禁短書猶可記聊影託
微吟

依韻和酬邵不疑見答

君才若巨賈既富仍深藏遂兼碌碌貧共處安可
量滔滔大澤陂渺漫入幽荒徒欲窮端倪憑高何
相望一日以文繡被此糞土墻門徒三千人起予
唯卜商薄言昧纖悉懷憂思萱忘美璞委彫琢以
未知我詳但念故時朋所樂來遠方慎勿以名使
取敗非相當

贈張伯益

張伯益風義自足常遊遨醉彈琵琶聲嘈嘈雷車
急輶蛟龍號曲終放撥解紫絛勇氣索筆作小篆
李斯復出秦碑高不數宣王石鼓文快健欲敵橫
磨刀奕棋絲桐且置之衆善多取精神勞

依韻和邵不疑以雨止烹茶觀畫聽琴之
會

彈琴閱古畫煮茗仍有期一夕風雨來日喜農畝
滋中河不阻漕舟楫亦所宜況聞新疾愈當與嗜
好睽何須顧小約豈不有他時淡泊全精神老氏
吾將師幸因荅來章敢不以此咨此咨有深理願
君勤且思

依韻和不疑寄杜挺之以病雨止冷淘會
邵杜二良守相逢欲盡沽醉促膝一開顏衮衮言有
味或嘆季路宜或語伯夷是各懷忠義心要終豈
同異我實踈賤軀政治未使試預茲高古談懦志
生勇氣明當饌湯餅疾雨晦天地一日不見君何
止如三歲口腹尚乖期榮華可推類嗟嗟勿復問
安恬固無媿

獨酌偶作

東路歸梁懶黃流下汴深眼穿南去翼耳冷北來
音風雨昏斜日乾坤入醉吟不憂貧且老自有伯
鸞心

荅杜挺之遺鰲魚乾

百年蠹柳根半浮揭屋顛風吹欲倒寸步泥深登

岸難鯀乾助飲隣船老

宛陵先生文集卷第四十六



